

- 1303 Creta, supplementis ex Creta & Eubœa acceptis, septem & viginti triremes habuit. Belletus Justinianus, qui cum imperio ad id bellum est missus, multas Græcorum naves (congregari ne ausas, an per occasionem oppressas, non reperio) in suam potestatem redegit. Omnes Græci generis qui in navibus fuere (quia, credo, eorum fraude Venetum nomen cum Balduino paucis ante annis fuerat Byzantio ejectum) ad unum laqueo necavit. Inde ad populationem conversus, omni maritima ora, quæ est a Pera ad Argirum, ferro ignique sæde populata, tantum hosti metum injecit, ut pecunia, quæ debebatur, reddita, pacem penè supplex a Veneto impetrarit. Victrix classis cum quindecim captivorum millibus domum est reducta. Erexerat victoria hæc civitatem, cladibus secundo bello Ligustico acceptis domesticaque conjuratione attonitam, in spem maximam Reipublicæ in meliorem statum retrahendæ: quum Ferrariensis motus in majus quoddam coniecit discrimen. Acciderat diuturna Imperatorum ab Italia absentia, ut clarissimæ aliquot Cisalpinae Galliæ urbes novos essent Principes sortitæ: ut Scalanos Verona haberet, Mantua Gonzagas, Ferrara Æstenses, cujus familiæ viri anno antea sexagesimo quam hæc gesta sint, Salinguerra ejecto, urbem ipsam pro Romana ecclesia administrare cœperunt: injectoque deinde Mutinæ locisque finitimis fræno, eo usque eorum opes creverant, ut Carolus secundus Neapolitanus Rex, Beatricem filiam Accioni, ea tempestate florenti, in matrimonium locaverit. Hunc Friscus ex aliena uxore, ut ipse prædicare solebat, filius, anno quo Beatricem duxerat, insidiis exceptum in carcerem conjicit, conjectum ad mortem compulit. Mortuo Accione, scelestissimus adolescens principatum parricidio quæsitum, Ferrariensibus paucis cum ipso Antislite annitentibus, sibi interim firmare studuit: & jam fere omnia adeptus, arcem huic urbi ea parte, qua Bononiam itur, inde Pado accubantem, nondum receperat. Ad eam oppugnandam (quia sine navigiis ob fluminis vicinitatem præsidium domari non poterat) ad Venetorum opes confugit: a quibus auxiliari classe accepta, quum lo-
- cum

1307
Ferrariense
bellum.